

**Zeitschrift:** Romanica Raetica  
**Herausgeber:** Societad Retorumantscha  
**Band:** 13 (1998)

**Artikel:** Historia, lungatg e cultura  
**Autor:** Maissen, Alfons  
**Kapitel:** 12: II Museum "Casa Carniec" a Glion  
**DOI:** <https://doi.org/10.5169/seals-858963>

#### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

#### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

#### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 24.08.2025

**ETH-Bibliothek Zürich, E-Periodica, <https://www.e-periodica.ch>**

## 12. Il Museum ‘Casa Carniec’ a Glion

(En: *Radioscola*, 1981, 100, 1-16)

*Vuler metter oz en pei in Museum etnografic de vallada ha num Vus. Bia digl uorden necessari ei gia dismess. Impurtonts umens dil mistregn e dil vegl puresser han dagitg schau dar orda maun lur uaffens. Ils incumbensai per la rimnada e per l'exposiziun han ina greva posiziun. Biaras caussas rimnadas han piars lur numis, las modas de laver sepiarsas. Per vegnir a frida de dar nova veta alla reha rimnada ei il MRS vegnius incumbensaus ded eruir e de descriver igl entir inventari a nova veta. Quei project vegn a cuzzar 5 onns ed ei sustenius da pliras instituziuns.*

Ils 4 de fenadur 1978 ei vegniu fundau a Sagogn in comite d'iniziativa per in niev Museum regional en Surselva. Il comite, presidiaus da cusseglier guernativ *dr. Donat Cadruvi*, dat en quella emprema sesida l'entschatta concreta ad in'idea che pruieva da decennis el tgau. En ulteriuras conferenzas vegnan normas ed uordens stipulai che dueigien promover las lavurs e preparaziuns necessarias per realisar quei project cultural de gronda muntada. Il *Museum regional Surselva* dueigi sespruar de metter en salv ed exponer caussas impurtontas creadas da nies pievel muntagnard els davos tschentaners. Il caracter du eigi esser quel d'in Museum mistergner e puril cun tut quei che quels dus terms e noziuns cumpeglan: uaffens, indrezs, urdegs, objects de tutta natira fatgs da nos mistergners e duvrai en nossas vischnauncas tochen viaden els davos decennis.

Il comite d'iniziativa ha lu era sclariu beinspert la pusseivladad de fixar il casament ed il liug de dimora adattau per l'exposiziun futura della rimnada messa en moviment. La tscharcha croda sin ina casa venala el ravugl dil marcau vegl de Glion, la schinumnada *Casa Carniec*, plazzada gest sut l'enconuschenta *Casa Gronda*. Ei setracta d'in vegl séz della enconuschenta famiglia *Schmid de Grüneck*, documentada gia el 14. tschentaner per famiglia burgheisa de Glion. Il fundatur della famiglia nobilitada e munida cun in uoppen della siarp, cul predicat 'de Grüneck' (romontsch: Carniec), vegn 1544 en possess de quels dretgs. Sutvi vesein nus in crap de uoppen della famiglia digl onn 1611

che stat sur ina porta d'entrada della casa. Ils fundaments della casa Carniec ston esser bia pli vegls, havend discuvretg egl intern in maletg fresco che datescha d'entuorn ils 1540. Ed ins sa vess supponer che quei seigi stau l'emprema casa baghegiada directamein dalla famiglia Schmid de Grüneck. L'imposanta *Casa Gronda* stat gest sur la *Casa Carniec*, denton veginida baghegiada eis ella pér 1677. Ella ha probabel fatg svanir in'ala della veglia casa de famiglia per slargiar la vesta encunter il Rein.



Ils dus uoppens d'allianza della famiglia de Glion: *Schmid de Carniec*, 1611/1710, ein tschentai sur las portas d'ingress della Casa Carniec, edifeci baghegiaus avon 1611.

La *Casa Carniec* ei silsuenter – la famiglia Schmid de Grüneck ei morta ora 1738 – ida vi en biars auters mauns e la finala deconstruïda pliras gadas e decadida.

In impurtont pass, fatg entras il comite d'iniziativa, succeda ils 21 de mars 1979 culla suttascripziun d'in document de fundaziun per il niev Museum. Enaquella vegin era la cumpra dil casament francada. Quella ei succedida, conform al contract, avon che igl onn 1980 ei staus alla fin.

Cun quellas acziuns entscheivan las lavurs de restauraziun dil vast casament. Per quei intent ei ina Cumissiun de baghegiar veginida formada ed ins ha previu in collegi d'architects che han d'haver quitau per la planisaziun e realisaziun dellas renovaziuns edificalas.

Ina cumissiun ordvart impurtonta ei quella che ha supriu la rimnada dellas finanzas necessarias. Per quella ei de gronda impurtonza la simpatia e la liberalitad davart dil pievel sursilvan e grischun, d'uniuns ed instituziuns cantonalas e federalas. Mo ina massiva urbida finanziala garantescha ina tal vasta e complexa restauraziun dil baghetg, igl acquist d'indrezs moderns per ils spazis d'exposiziun.

In quitau de tut auter caracter ei quel della rimnada d'objects adattai per il niev museum. Era cheu ei vegniu agiu. Mo igl ei reussiu mo ton sco in fav en in lag. Era cheu ei la beinvulientescha publica de gronda muntada. Ins vegn a capir che senza igl uorden, las caussas necessarias, ils uaffens, ils indrezs, ils products spirtals e mistergners de nos perdavons, ein tuts tschels sforzs adumbatten. En quei senn giavischa il suttascret, incumbensaus culla rimnada, de survegnir buns contacts e legreivels patgs cun nies pievel sursilvan. Tuts che san gidar, era mo cun informaziuns u cun ina pintga ni gronda caussa museala.

## Tgei ei in Museum?


Il plaid ‘Museum’ vegn duvraus oz da quasi tuts ils lungatgs de quest mund per indicar il baghetg che cuntegn ina collezioni de caussas preziudas dil vargau, artefacts antics, mo era lavurs artisticas, maletgs, sculpturas e nundumbreivlas otras categorias de caussas che pertuccan la creaziun humana dils temps vargai e dils temps presents. Il plaid Museum sa era significar ina singula collezion d'ina specia ni l'autra.

Museum ei ina denominaziun greco-latina e significava avon varga 2000 onns en Grecia in Sanctuari ni Tempel dellas Musas, tenor la getga feglas de Zeus, igl emprem Diu dils Greces. Ellas protegevan igl art e las scienzias. El temps bizantin vegn Museum duvraus per indicar ina Biblioteca, e bibliotecas eran stretgamein ligiadadas cullas scolas filosoficas de quels temps, e perquei vegneva il plaid era duvraus el senn de Scola.

Dapi il 18. tschentaner ei in Museum in baghetg public, che cuntegn collezioni, uordens fetg prezius, scaffi pli baul e tras tuts ils temps dal spért e maun human. In museum ded oz survesha alla rimnada, alla conservaziun, alla perscrutaziun e re-

stauraziun ded objects culturals. Mo oravontut dueigi in museum survir alla presentaziun plascheivla, de clara disposiziun dils fatgs rimnai. Il spért che schai en bunas prestaziuns de nos perdavons san scaffir contacts necessaris e fetg interessants cul temps enten il qual nus vivin oz en tutta furtina. Seriusa lavur de museum pretenda documentaziun, quei vul dir che tut il rimnau dueigi vegnir registrau, fotografa e surtratg cul gest num. Sche il luvrer en quella vegna dil Segner ei fetg capavels e versaus sa el era descriver igl uaffen e metter el en sia vera funcziun. Quei ei denton buca adina pusseivel, era buca culla megliera veglia, demai che caussas ed uaffens dapi onns ed an-norums senza diever, piardan il contact cun nos tschurvials.

En quei mument ston ins saver segidar. Quei va cun rimnar ed ordinar cudischs informativs, cudischs de mistergners, sur dil puesser, sur dil traffic e tschiens auters. En bibliotecas della California eis ei buca daditg stau pusseivel a nus de photocpiar interessants cudischs d'uaffens e de metodas de lavur, ch'ils Americans ded ussa, tuts vegni avon tschiens onns ord l'Europa han reconstruiu, amplificau ed adaptau a lur nova patria. Els vevan priu cun els lur savida purila, quella dils umens d'uaul, de mistergners, cunzun de lennaris e scrinaris, priu cun els enqual uaffen. Era ils *fravis ners*, nos fravis de fier, ein stai de gronda impurtonza per baghegiar ed ereger ina nova e gagliarda patria vi sur mar. Igl Engles numna il fravi de fier *Blacksmith* per differenziar el da quels d'irom, d'argien e d'aur. Ils pioniers vi el niev continent han saviu far stedi diever dellas enconuschientschas ord la veglia patria, han purtau leu la cultura misternera, purila, exercitau ils mistregns ils pli divers, schizun augmentau quels, enrihiu uaffens ed indrezs, e cun lur spért allert inventau vinavon sin fundament de savida europeica. Nus lessen indicar mo in detagl per exempl. Per vegnir vinavon el runcar la tiara dad immens uauls serrai, han ils Americans stuiu inventar uaffens pli curaschus, d'enormas dimensiuns per il transport de blocce. La resgia d'uaul ei daventada, considerond las plontas de gigantica grossezia 4 m liunga, ils berts cun rodas de 4 m altezia. Cun interess vein nus legiu en in cudisch american ch'il *roclabuoras* (Kehrhaken) seigi in'invenziun americana, silsuenter surprida cun tschaffen e profit da



Ina resgiutta de spadas. Barcuns entirs de lenn, portas nuegl che drovan spadas de lenn, traversalas per tener ensemes las differentas aissas. Quella resgia duvravan ins per funsar, per resgiar viaden ils tagls che tschaffavan la spada construida en fuorma de cuaschualma. Ins vesa la struba de lenn de distschentament.

nos umens d'uaul e de resgerias (Sägewerke) ell'Europa. Cargai cun 30 cudischs sur dil mistregn essan nus arrivai a casa, vendend il basegns d'ina biblioteca scientifica per in Museum.


Ina splauna ni cungi de cudetschas. Il canistrer tegn quel sil scapulier de schurmetg mess sil schanugl dretg e trai suto, laschond pigliar il tagliom veseivel las cudetschas. Dalla ruosna sezuan neuado las stialas. Cungi e splauna de fuorma speciala.

Savens retscheivan ins objects museals en in stan e stadi fetg critic. Ins anfla denton la caussa per necessaria per la completaziun d'ina seria. Era san tals objects esser rars ed interessants per la collecziun. Ei maunca tscheu e leu forsa ina curegia, ina clavella, in stabet, ina zensla, uaffens de lenn miez magliai da mulauns, fier ruinau, il battagl d'in stgalin urschiaus, ina sigir senza moni, in cudisch senza feglia, ina mobilia senza funs e truchets. Ei drova in bienton savida, pazienza e curascha per metter tut en uorden. Da rutinai e versai enconuschiders della materia enderschin nus adina puspei ch'il regulament ed il manteniment dils objects caschunan savens de pli quitaus e cuosts che tut tschellas lavurs.



Ina part dil marcau vegl de Glion culla *Casa Gronda*, dretg,  
e la *Casa Carniec*, seniester, il niev Museum Regiunal a Glion.



Ei secapescha che in pign museum regional ni d'in vitg sa buca mantener in grond diember d'emploiai ufficials. Quei san in museum cantonal ed ils gronds instituts d'impurtonts mar-




Duas autras fuormas de *tanvialas stuornas* de lenn, cullas tanvialas de snecca.

Diversas autras fuormas de *tanvialas stuornas*, defectas, mo tut-tina d'apreziar en lur fuormas ed execuziuns. Cheu vesan ins la lavur ch'ei drova per reparar, infermir ed amplificar (sut seniester).

*Tanviala stuorna* en lenn cun tgau-tradel de scumiar.



caus selubir. En nies cass drova ei ina gronda bunaveglia da tuttas varts. E tonaton, per garantir il success d'ina tala interresa drova ei glieud scolada, permanenta, che surpren responsabladads. Quei stuessen era las autoritads cantonalas e federalas saver.



Dus *firliforlis* ch'ins duvrava de cuntschar vischala de tiaracotga etc. In de quels ha la roda de catsch (de schueun) de fier, l'autra de dir lenn fignicler. Las astas vegnan movidas anavon ed anavos culs zugls corda vid asta e traversals, ina ga ina cadeina, epi ina corda. Ils tradels ein buca ils originals.

In grond agid per in museum ei la fotografia, ils films de vegls mistregns, era dias e pindellas de veglias instituziuns, ded usits, de fuormas e metodas de lavur. Cun quels agids sa in museum era survir de canorta de contacts e discussiuns. In museum vul far clar ch'ei detti negin presens e futur senza il vargau, mo era ch'il presens sulets seigi vivs e stgis d'entelgir il vargau che nutrescha igl avegnir.




In resgiut de resgiar fier. Ins fetschi stem digl artg en in toc lenn dir. Ils mulauns havevan gia taccau lur preda.

La buna informaziun drova vivas relaziuns, in spért viv per il bi scopo d'in museum. Pia contacts denter ils museums d'ina regiun, contacts denter ils menaders e la scienzia. Era en quels graus ei gest ussa bia laver en preparaziun.

In patratg murtira mintga rimnader ded antiquitads per in museum. El vesa buca bugen sche rauba schi preziusa va cun la hermeria dalla tiara giuado. Quei ei ina depauperisaziun enorma de nossa cuntrada. Gest ils jasters, che nus duvrein scoi para per sescumentar, apprezzieschan depli che nus nossa cultura vesivla. Ei stuess vegnir schi lunsch che nossa populaziun perefress de surdar en emprema lingia bunas caussas instructivas al


museum che giavischa quei en tutta ardur. Quella midada de spért ei gia sin rucca, mo il fil lundero sin fleivlas teilas.

Igl ei interessant de persequitar tras tschentaners conta rauba ch'ei vegnida rimnada e migliaccada en tut l'Europa, antiquitads religiusas, profanas, e quei cunzun dad imperaturs, retgs, conts, ducas, mezens, autoritads ecclesiasticas etc. Cun tals scazis levan ils glorijs rimnaders buca mo conservar veglias regurdientschas, mobein era demonstrar lur pussonza, lur gloria.





La schinumnada ‘cogna’ de vischlers (Reifzange) digl onn 1743. Ella survecha de trer si il tscherchel sut. Era sur de quei uaffen savess ins scriver in’entira historia.

Nus savein d'in duca, de Carli il temerari, ch'ei semess alla testa d'in'armada encunter ils Svizzers cun arcuns d'immensas rihezias. Cun quei vuleva el suottastrihar sia posiziun de victuria ordavon. Era in Napoleon, el novissim temps d'aunc pli dubius regenters, che han sequestrau e transportau gronds beins culturals naven dallas tiaras conquistadas en museums de lur residenzas.



Treis differents *cuntials de cavrinas*, per tagliar ora las cavrinas giudem las dubas; leu entran ils funs dil vischi.

In *tschariesch* d'in soli rudi guilas fier. Ei dat era dubels e treidubels tscharieschs (sut seniester).




Nus lein denton buca semiserar cun ils museums de gronds marcaus mundials sco Paris, Berlin, Leningrad, Moscau, Vienna, Minca, Washington e tons auters. Nus lein restar mudests, mo tuttina empruar cun tutta energia de conservar per nos vegnentsuenter ina biala ed interessanta memoria della lavur, dil patertgar de nos perdavons. Igl ei instructiv de veser en quels gronds museums marcauils partiziuns che savessen survir d'exempel per nossas pusseivladads pli restrenschidas. Mo en plirs secturs savein nus, sche nus lein, tarlischar. Quei drova sforz era davart dils responsabels en vischnauncas, el cantun, ella confederaziun. In scazi de tala maniera ei in enrihament effectiv, material, mo surtut spirtal de nossa tiara. Ed ins savess s'imaginar che presidents de vischnaunca, spirituals, scolasts, cussegliers, intellectuals savessen esser de pli grond agid che tochen dacheu. Ins savess era s'imaginar che in e scadin dils deputaus mettessen in gi ad jamna sin tgau la biala capiala culturala de firaus e sespluntassen cun slontsch ellas combreas per agid moral e finanzial.

Igl ei bien de punctuar aunc ina gada l'immensa premura che otras tiaras attribueschan a collecziuns sco sura allegadas. Nus anflein tochen vi sur mar collecziuns admirablas d'uaffens de tutta natira, indrezs purils, indrezs mistergners, uorden duvrau el puesser, en cuschina, giun tschaler, vischala de lenn, ded irom, vehichels de tutta specia per differentas modas de traffic, rodas de filar, crocs antics, fuorns ed uorden de far paun, talers, entiras resgias mecanicas traiectadas cun aua, mulins, roders, vischlers, fravis. Sche grondas naziuns tegnan car lur vargau, astgein nus segiramein era far ton, nus che perdein cun mintga caussa era in bi ed interessant plaid romontsch e dil dialect svizzer tudestg.

### *Il crutsch de terscher (28 x 19 cm)*

In tut agen pategl quei *Crutsch de terscher ni de terschar*. Cun siu péz de struba, culla fuorma de crusch fa el endamen la structura dil tradel de *cycluns* alla pagina 303. Cheu ei denton tut fravegiau en in toc, nuot sa ir a piarder auter che igl entir, ed entirs dat ei paucs pli. Il crutsch vegn strubegiaus ell'altezia



Il *crutsch de terscher*. El vegn strubegiaus en in post de bliec sidretg, en ina preit, u schizun en pumera. Vid quei crutsch vegn la ragisch-curom culs tschun cantuns, tagliai ord il tgir, fermada per tractar las curegias e far tar-schola tochen che la tretscha ei finida.

della bratscha, horizontalmein, en ina preit, in piest ni pumer, demai che la bratscha, pugns e mauns han cheu de luvrar e barhar. El péz git de crutsch vegn la ragisch-tgir cun las tschun curegias penderlontas fermaus. Sper duas outras operaziuns de scantunar e schubergiar las curegias surveschan las quater foppas el fier traversal per strer e formar las curegias avon che terschar ni far terschola. Vid quei bratsch de metal, bravamein isaus, vesan ins la lavur fatga tras decennis.

### **La gartirola de truchet per sgartar caschiel**

In *chistet* cun truchet de remarcabla construcziun. Il chistet, sco era il truchet ein ferm encrenai els cantuns cun empunidas de cuaschualma. Il truchet de 30 cm lunghezia retscheiva da




Ina tut atgna gartiola de varga tschien onns .Il caschiel sgartau deva bufatg giu el truchet e nuot che mava sperasgiu. Ella deriva da Riein e vala per in'invenziun de mistergners purils. – Mesiras: 45x14x9 cm.

surengiu, tras il fier de ruosnas, il caschiel sgartau. Interessants ei il fier-gartiola, fatgs da dus tocs stuors, forsa vanzai da tetgs u canals de stuors. Igl ei quella gada buc in plat-faultsch sco quei ch'ins vesa savens per gartiolas. Ins vesa l'empunadira dellas duas buccadas, mo las raglas de ruosnas tegnan ferm lur direcziun. Las ruosnas ein fatgas avon che surtrer, e quei sin ina massa cun ruosna sesurvend d'ina guota ni de rebattider e marti. Ina retscha ei furada tras dad ina vart, l'autra da tschella, pertgei mo mintga autra retscha ei alzada ed ha tagliom rebattiu che lavura. Igl inventader ha fatg bein de metter las retschas alla schrega, drizzament che dat tut auter miers. Ei retracta forsa d'in unic exemplar de quella maniera, ed ins sto esser instruius per enconuscher siu diever. Quei chistet ei vegnius surdaus ensemens cun pliras outras interessantas caussas da scolast *Lucas Willi* a Riein.

## In interessant uaffen en singulara perspectiva

La forza creativa dil carstgaun tras ils temps de nossas èras ed epochas semanifesta facticamein els muments momentans d'acziun immediata. Il resultat ein products, producziuns personalas, denton acts s'emplunai en zugls de forzas da tuttas varts, tras generaziuns, revoluziuns pascheivlas, negativas, che vegnan latentas ed effectivas, era in spieghel de laver contemplativa, ruasseivla che sesviluppescha en tutta calma ed en gronda surfatscha, universalmein.



La *cuclunera* ni *clucanera*, fatga igl onn 1694. Uaffen descrets en quei capitel en tutta fuorma, vegn era numnaus *tradel de cucluns* etc. El sa mo vegnir duvraus dal *vischler* e dal *chiefer*. Igl emprem fa vischala de latg etc., il secund construescha sias buots cul deletgeivel vin vuclin. Sper la spina de vin stuev'ei era cheu dar *cucluns* ellas buots plazzadas magari en fuormas giganticas en vegls tschalers de vin.

Igl ei buc igl intent d'entrar cheu en svilups de gronds arts, de picturs, sculpturs, mobein de contemplar il sempel maletg

sura plazzaus. Per tgi ch'enconuscha igl uaffen che nus descrivin sut empau pli da rudien, survegn el tgierp ed olma, in'unidad remarcabla, de fuorma semplissima, combinaziun de lenn e fier. Ins vesa dalla fuorma dil mantener ch'igl uaffen ha la funcziun d'esser menaus, da seniester a dretg. En principi in tradel cun in cunti!

Lenn e fier ein ils materials, manischeivels en pliras e diversas mahinaziuns e stadis de seccatura endirida! Il lenn dat al maun la pusseivladad de menar, il fier, en quater tocs, ha duas funcziuns, il péz prolungiu de tradel, miez struba, empau sibla, presuma funcziun de tegn centralistic, che pretenda preforaziun de tanviala. Il fier travers, horizontal, transmessibels e fermabels cun dus cugns advers, ha, menaus engiuviars in tagliom de pala. Pia tradel ni nezza de tagl centrifugal? En tuttacass stat quei tagliom el center, luvrond en menadira excentrica.

Ei quei in legn per nos scolars, per ils carschi, per ils perderts? Avon in onn vein nus fatg ina emprova cun in auter uaffen, il ‘petg de cavar ragischs d'ansauna’, e manegiau ch'ins savessi riscar de metter pag 10'000.– frs per quel che legni la funcziun ed il diever, il num. Pér pli tard hanenzaons dau is. Cun in auter uaffen, il ‘giavel’ (numnaus cavamugrins) savess ins proceder en medema moda. Igl ei mo per demonstrar che il temps fa emblidar plaids ed objects, sch'els vegnan buca pli duvrai. E nus carstgauns, sche nus seduvrein buc el bien ed en mesira, con spert ei tut emblidau? Igl ei era buc in giug per far star mal enzatgi. Il scribent de questas enconuscha sez memia nuot de tut quei che vegn a mauns, per esser garmadis.

Igl uaffen reproducius alla p. 275 ei buca ded oz; quei demuossa gia igl entagl dellas cefras 1694. In um dil lenn sto haber fatg quell'opra el niebel e lonzi material, engraviau las cefras cun adatg, gust ed art. El enconuscheva siu mistregn, e siu cunti tagliava bein. Ei drova mo quater cefras per dar il bul de qualitad, d'antiquitad. Quellas cefras ein vegnidias fatgas senza gronds intents dal temps dell'emprema ediziun della «Consolazion dell'olma devoziusa», stampada 1690 a Nossadunna della Glisch da habils mauns ed indrezs claustrals; leu in sempel mistergner, cheu in um scolau. Il pader ha dau siu num, il sempel mistergner ei curdaus da tutta memoria. Il sacerdot ha giu

sogns intents, il sempel mistergner emprau de dar cuntegn real, d'attribuir cun sia carezia de pli che quei che duvrava. A siu uaffen lev'el dar veta pli liunga, dar perdetga de sia lavour per la lavour, de siu patertgar. E pilver, 300 onns han lenn e fier, materias che setaglian senza senn e fermonza, resistiu, e per schabetsch ein ellas buca i a smerscha.

Igl entagliader, bein in vischler d'in encarden montan, ha stuiu engaschar siu cumpogn, il fravi dil vitg, per realisar siu uaffen. El ha martellau il fier e dau fuorma alla ferradira, enferrau il mantener. L'asta de fier stueva vegnir construida fermada viaden el mantener. Ins observa las rebattidas de fermaziun. L'asta sefa en siu miez quadrella, daventa pli consistenta e sia fin sefutra anavos en ina conicitad de struba. Il toc quadrel de miez ei impurtonts. El s'embuortga cun novas forzas d'aigra, ei perfuraus d'ina ruosna rectangulara enten la quala in tagliom de pala urschiaus a bass, vegn tenius alla lunghezia periferala tenor basegns mistergners, encugnaus da cugnets che secatschan in encunter l'auter.

Igl uaffen ei universals. Avon enzacontas jamnas vein nus viu el exponius en museums mistergners della California, era a Washington, maletgs clar e bein en cudischs de mistregn schi interessants della Tiaratudestga, avon enzacons onns en Jugoslavia, ell'Italia, sin tabellas de survesta en Frontscha. Igl uaffen ei enconuschents dapi il temps miez, adina puspei construius a medema moda, adina duvraus dal medem mistergner, perfetgs en siu esser sc'ina violina che ha contonschiu siu pensum de fuorma finala. Quei uaffen ei universals partenent la derasaziun, specials en mauns specialisai, gie specifics per in soli sulet mistergner, auncallura da dubla frastgaziun e natira mistergnera, duvraus a siu temps en ault survetsch dil vin, en siu dubel esser dil latg e siu tractament, e quei sur tuts continents, era el Grischun, ella Surselva, ellas Ferreras, il davos bein aunc avon 50 onns en nossa tiara.

Nus lein buca schar star en marveglias pli ditg. Igl ei il *tradel de cucluns*, numnaus el liug dal qual quei exemplar deriva: *clucanera*, per tudestg: *Spundbohrer*. ‘Clucanera’ dat en lungatg sursilvan *cuclunera* (*cuclun+aria*), cuminamein numnaus: *tradel de cucluns*, che survescha de tagliar ora en panaglias,

butschins e buots las ruosnas cuclun, en bigneras las ureglas dellas dubas d'ureglia dallas varts. Nus vein priu cheu igl exemplar marcaus cun sia vegliadetgna e de biala fuorma entira, surdaus a nus avon 50 onns dad in venerabel vischler de Calantgil (Ferrera), supplicond persuenter in pèr caultschas carpun ed ina splauna fina de filar.



Vesta della fatschada sura della *Casa Carniec*, cun ses dus portals. Survart vesan ins la cantunada er-crada della *Casa Gronda*.